

艺
文
类
聚

艺

文

类

聚

藝文類聚卷第四十八

唐太子率更令弘文館學士歐陽詢撰

明

秣

陵

王元貞校

職官部四

錄尚書
吏部尚書

尚書令
尚書

僕射
吏部郎

侍中

黃門侍郎

散騎常侍

給事中

中書令

中書侍郎

驃騎將軍

錄尚書

應劭漢官儀曰章帝詔曰司空牟融典職六年勤勞

不怠其以融爲太尉錄尚書又曰和帝策書曰故太

尉鄧彪元公之族三讓彌高海內歸仁爲羣賢首其

以彪爲太尉錄尚書事百官總已以聽又曰殤帝策書曰司徒徐防以臺閣機密施政牧守其以防爲太尉錄尚書事百官總已以聽又曰冲帝策書曰太尉趙峻二世常與機衡有匪石不貳其心大司農李固公族之苗忠直不回今以峻爲太傅固太尉叅錄尚書事又曰靈帝策書曰故太尉陳蕃忠亮謇諤有不吐茹之節司徒胡廣惇德允元五世從政今以蕃爲太傅與廣叅錄尚書事

王隱晉書曰賈充爲太尉錄尚書五年伐吳爲大都督吳平上遣侍中程咸犒勞增邑八千戶

晉中興書曰明帝后庾氏爲皇太后九月癸丑皇太后臨朝制司徒王導錄尚書事

沈約宋書曰高明永初三年尚書令揚州刺史徐羨之爲司空錄尚書事又曰孝武帝即位以大將軍江夏王義恭爲太尉錄尚書事又曰諸公錄尚書事古制也王肅解尚書納于大麓曰堯納舜於尊顯之官使大錄萬機之政案漢氏諸吏平尚書奏事後霍光以大司馬大將軍平尚書事

傳暢故事曰何劭王戎張華裴楷楊濟和嶠爲愍懷太傅通省尚書事張華爲光祿大夫尚書七條事皆

詔而後行惠帝之世太保衛瓘太宰河間王顥太傅東海王越皆錄三省尚書秘書事

表齊謝朓爲明帝拜錄尚書表曰升降玉階對揚休命六轡在手千里何借司會天宮之統尚書百僚之本弘之即庶績惟凝替之則彝倫斯斁修身踐言本慙五美果行育德未階六正妄屬負圖之寄多謝五仁之績操檣櫓於龍津荷梓梁於雲構無以輔位明堂遺象麟閣

啓陳徐陵安成王讓錄尚書表後啓曰臣聞間平就國乃盛漢之常儀邠霍無官實宗周之明典何則皇

季之重非待歷階王爵之隆自高羣辟况臣戢翼要
荒亟離寒暑進慙趙勝能定楚從退匪齊文馳免秦
厄固以內切皇心外貽家恥甘輸重餌降禮單于迺
城十五如讎和璧市鄉三十聊同寶劒武夫力而獲
諸原微臣還而反諸敵晤言馬駿著隴右之功追念
曹彰克烏丸之虜前王子弟若此勲庸偏其反而豈
可勝愧

尚書令

漢書曰張安世字子孺少以父任爲郎因善書令給
事尚書精力於職休沐未嘗出行幸河東亡書二篋

詔問莫能知唯安世識之具作其事後購求得書以相校無所遺失上奇其才擢尚書令

漢雜事曰尚書黃香爲東郡太守乞留宿衛拜爲尚書令秩二千石

漢官儀職曰尚書令主贊奏揔典綱紀無所統秩二千石

東觀漢記曰侯霸爲尚書令深見任用樊準爲尚書令明習漢家舊事周密畏慎申屠剛爲尚書令蹇蹇多直言無所屈撓又曰永平七年宋均徵爲尚書令忠正直言數納策謀每駁議未嘗不合上意

張璠漢書曰左雄爲尚書令限年四十先試經然後
舉孝廉

續漢書曰陳蕃出爲豫章太守性方峻不接賓客徵
爲尚書令送者不出郭門

百官表曰尚書令是謂文章天府銅印墨綬五時朝
服納言幘進賢兩梁冠佩水蒼玉揔攝諸曹出納王
命敷奏萬機書曰龍命汝納言夙夜出納朕命惟允
詩云惟仲山甫王之喉舌蓋此謂也

魏志曰明帝即位進陳嶠爲尚書令車駕常幸至尚
書門嶠跪問帝曰陛下何之帝曰欲案行文書耳嶠

曰此自臣職分非陛下所宜臨也若臣不稱其職則請就黜退陛下宜還帝慙迴車而返又曰太祖進荀彧爲漢侍中守尚書令又曰裴潛爲尚書令奏正分職簡名實出事使斷官府者百五十餘條費禕別傳曰禕代蔣琬爲尚書令以朝脯聽事其間接納賓客加之博奕不廢後董允代之旬日之間事多讐積允曰人之才力相懸若此

曹羲九品議曰尚書尊官也親作納言易曰樞機之發榮辱之主

漢和帝南陽左雄爲尚書令天下皆慎選舉選舉所

知自其職也

山濤啓事曰尚書令李胤遷處缺宜得其人征南將軍羊祜體儀玉立可以肅整朝廷

王隱晉書曰樂廣爲尚書令所在無當時之功譽然爲後人所思又曰咸寧二年李胤爲尚書令雖歷職內外而在公退食家室至貧儉兒病無以市藥上賜錢十萬

齊職儀曰秦漢之世委政公卿尚書之職掌於封奏令贊文書僕射主開閉令不在則僕射奏下其事魏主重內職八座尚書任同六卿舜舉八元八凱以隆

唐朝令號八座爲元凱謂曰賢能用事義如昔也

箴晉摯虞尚書令箴曰舜納大麓七政以齊內成外
平風雨不迷補我袞闕闡我王繇王繇允塞四海咸
休雖聖雖明必賴良才無曰我智官不能任發言如
絲其出成綸千里之應樞機在身

碑後漢潘勗尚書令荀彧碑曰夫其爲德也則王忠

履信孝友溫惠高亮以固其中柔嘉以宣其外廉慎

以爲已任仁恕以察人物踐行則無轍跡出言則無

辭費納規無敬辱之心機情有密靜之性若乃奉身

蹈道勤禮賁德後之事間匪云予克然後教以黃中

之叡守以貞固之直注焉若洪河之源不可竭也確
焉若華嶽之停不可拔也故能言之斯立行之斯成
身匪隆污直哉惟情紊綱用亂廢禮復經於是百揆
時序王猷允塞告厥成功用俟萬歲

表後魏溫子升臨淮王彧謝封開府尚書令表曰臣
道愧山東氣慙隴右激水弗功搏風無力但以平原
帶地資緒極天發趾自高理翮以遠出臨侯服旣乏
刺舉之能入踐帝闈又無應對之美空復受弋清廟
推轂朱門孝闕淚河功慚汗海大寶遠隆橫草未樹
顧以有涯願言知止又爲魏南陽王允寶拒讓尚書

令表曰臣聞立而託乘乃成致遠之功坐以運舟遂
有利涉之用若以輕任重課憑虛責實雖欲自勤終
焉靡效

梁范雲爲柳司空讓尚書令初表曰陛下繼明南面
復垂顯錄增榮益觀豈側身限而露不廣海塵不增
山微物知止敢忘自退誠以懷音感遇久妨彝序尸
祿昧寵取蹈風歌中寐軫心方飡疑慮寧可冒釐綜
之重負學製之談將玷朝微匪伊身議第二表曰臣
聞聖人在上愚智無以息隱天下有道方圓歸其能
是如以駑蹇之才不致問於千里瓦礫之質佇待價

於十城伏願陛下矜臣負乘之尤照臣匪飾之情迹
言觀用允授上才斂會流恩曲蠲下第則雲序斯平
彝章載穆

梁沈約拜尚書令到都上表曰竊位之譏允當斯責
王命私請有事相傾油雲湛露徒降旻昊之德弱縞
輕蟬不載丘嶽之重登階望席悅焉失步

北齊邢子才爲文襄皇帝讓尚書令表曰揚職萬機
揔任百揆想銜庶物準納羣僚何以助日月之光華
增天地之高厚反鑒取照匹此何難倒裳求領方之
爲易又表曰正以晝覽太山不假秋毫之察夜仰列

宿豈籍燭龍之明爵人以世旣非盛德之舉公門有私故足陵夷之運

陳江揔讓尚書令表曰臣弱歲立朝本無奇志每謂任登常伯足承基緒值梁季不造牧拙人間東竄三江南徂百越不知秦漢十有七年心跡退黜平生畢矣但性疎懶不屑死增俯仰乖時人物多忤天飛踐祚寄隆重謬以商丘之木遂比舟楫之材燕岱之石混同瑚璉之器當由崇賢使舉早守名節竊以天府文昌萬方之藪天官冢宰無所不統禮革三獨事昭百揆曠職云久三十餘載一旦開置必資望實豈期

廷典私偏濫庸菲薄陛下聽覽餘辰曲垂昭納遂斯
反汗高選具瞻則敝蓋黜惟使暮齒歲制月制賒臣
皓髮不以一怠

啓陳江揔除尚書令謝臺啓曰竊以昔之冢司今日
端揆頃同台袞無人則闕陛下將守安可叨賁謹當
奏承夜月翼奉三思之旨聲寄浮雲方祈九天之路
又除尚書令斷表後啓曰司會治本冢宰朝端搢紳
所屬儀刑攸在皇代以來無人則闕陛下將備厥職
用穆臣僚不容始自庸菲以謹物議當今藩翰至戚
不無其才廊廟重臣亦有其器伏願檢俞往之則闡